



# KHUTBA JUMMAH

HAZRAT MUHYI-UD-DIN AL-KHALIFATULLAH

*Munir Ahmad Azim*

20 Novembre 2015 ~

(07 Safar 1437 Hijri)

**(Résumé Khutba)**

***Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lors « Mauvais Conception de Jihad dans l'islam & L'Importance d'Ene Khalifatullah dans L'Ummah Muhammadiyya »:***

## **MAUVAIS CONCEPTION DE JIHAD DANS L'ISLAM**

Avant mo vine lors le sujet de mo Khutba Jummah azordi, mo pou cause ene ti peu saki fine passer dans la France, à Paris Vendredi dernier le 13 Novembre 2015. Déjà pour bane Français, avec bane superstition ki zot ena lors Vendredi le 13, ki sa mofinne etc., sa bane tuerie ki fine ena là li faire bien chagrin, surtout pour bane victimes de sa bane l'attaque là. Bé malheureusement, faut dire aussi ki le gouvernement Français, avec zot l'arrogance ki zot ena pas pé rode fer marche arrière surtout concernant fournissement de bane z'armes à bane dimounes de la Syrie avec l'intention pou renverse régime de Bashar Al-Assad et pou renforcé zot bane plans pou fer bane musulmans touye zot entre zot-mêmes, et ainsi affaibli l'islam de plus en plus.

Il est vrai aussi, ki sa kalité **Jihad** ki bane dimounes ki dire ki zot musulmans pé pratiquer, li complètement anti-islamique, parski sa c'est pas bane l'attaque justifiable ki zot pé fer, mais kot en même temps zot pé touye zot-mêmes, zot pé suicidé, kot zot ena sa l'intention de suicide là seulement pou touye bane innocents. Le gouvernement Français avec so bane l'idées racistes ki li ena lors l'islam, lors Hazrat Muhammad (saws) et lors bane musulmans ena bien bien tort, mais seulement bane musulmans en retour avec zot bane actions déplacer, zot bane actions extrémistes projette ene l'image bien déplorable de l'islam kot sa pé mette en danger l'identité même de nous bane frères et sœurs musulmans dans la France, kot la France pé vine encore pli méfiant et intolérant envers zot.

Couma mo ti dire zot dans mo Khutba Jummah le 1<sup>er</sup> Novembre 2013, kan bane musulmans pas pou réuni sous le Calife ki Allah fine élever pou zot, tanque ki l'islam pas pou uni avec ene même but, alors tous les temps bane forces adversaires pou rode piétine l'islam de plus en plus. Et alors, tanque ki pas pou ena ene coordination, ene discipline dans bane missions de l'islam, ene mission de paix et de soumission pour tous bane dimounes de la terre envers Allah (swt), le Créateur, alors bane musulmans pou continuer souffert.

Il est vrai ki à sak fois ki nous bane frères et sœurs musulmans pé la guerre, pé gagne piétiné, ki li avec bane Israelites et bane les autres pays « superpuissants » ou même avec zot propres frères de la même religion ki zot, surtout bane innocents, bane victimes, alors sa fer nous lé cœur bien fermal. Le Jihad avec z'armes li pas ene badinage. Bane extrémistes ki interprète l'islam à zot façon pé seulement humilier l'islam encore plisse, et la haine de bane les autres envers l'islam pé pli augmenter ; et alors zot gagne encore plisse bane raisons pou la guerre contre l'islam, contre bane doctrines de Hazrat Muhammad (saws) et fer passe l'islam comme ene la religion de terroriste. Zot oublier ki zot, zot fine fer nous bane frères et sœurs dans bane pays musulmans kot zot envoie l'armée lors l'armée pou fer ditort nous bane frères et sœurs innocents, kot zot même avec zot propre la bouche, zot dire ki zot pé fourni bane z'armes, kot zot aussi zot pé allume le feu de la guerre, kot sa capave vine bien vilain dans l'avenir. Sak pays, gouvernement pé prend zot superpuissant et de ce fait, zot oublier ki ena ene Créateur ki pli là haut zot. Zot, zot croire ki patente juger et touye bane dimounes dans zot la main.

Ena ki (l'Amérique) pé fer zot bane testes nucléaire. Sakaine pé fer provisions pou protégé so propre territoire (kot li pas loin ena ene troisième guerre mondiale couma mo fine deja fini dire zot dans le passé), mais dans la foulée c'est bane victimes, bane innocents ki pé paye les pots cassé. Sa bane victimes, sa bane innocents là et bane musulmans et aussi bane non-musulmans ki oulé la paix, ki pas envie ki le monde trempé dans ene la guerre sans merci. Mais là-dans saki pé plisse souffert, c'est dignité de l'islam, dignité de nous bien-aimé prophète, Hazrat Muhammad (saws).

Ki Allah éveille conscience de bane musulmans entier le monde, fer zot réaliser ki nous tout nous bizin uni, et reflecter vrai beauté de l'islam, sinon nous pou contigner reste piétiner par bane pays ki de jour en jour zot la haine pour l'islam pé augmenter même. Zot oublier bane souffrances ki bane musulmans fine bizin souffert dans zot la main (kot des milliers et des milliers fine mort et pas fine fer aucaine deuil national pou zot), et kan ene kitchose arrive zot soudainement, et zot gagne quelques victimes, alors sa bouleverse zot. Bane la têtes ki pé fer bane provocations, tandis ki c'est bane innocents ki paye tous sa là. Fer attention, mo pas pé dire ki mo encourage saki sa bane musulmans extrémistes là fine fer – c'est complètement anti islam – mais saki mo pé dire, victimes pour victimes, bane gouvernements de bane pays anti-islam pé prend conscience ki zot bizin uni, tandis ki bane musulmans zot, zot pé toujours séparer, la guerre entre zot-mêmes, bane Sunnis pé la guerre contre bane Shias etc.

Kan bane musulmans pou uni, c'est sa ki pou fer la force de l'Islam kot alors c'est Allah même ki pou mette Barakat là-dans et fer nous gagne la victoire ki Li fine promette nous. *Insha-Allah*.

### **L'IMPORTANCE D'ENE KHALIFATULLAH DANS L'UMMAH MUHAMMADIYYA**

A chaque fois ki Allah (swt) envoie So Khalifa lors la terre, bane dimounes refuse pour accepter li ; non seulement refuse pour accepter li, mais zot faire toutes sortes qualités complots pour empêche li propage le message de So créateur. Dans so message ki li donné, c'est pour protégé zot la foi et dirige l'humanité vers ene seul Dieu, enseigne zot le chemin ki amène vers ene seul Dieu. Malheureusement par zot l'arrogance et l'ignorance zot persister adore zot idole ki zot fine fabriquer. Ene Khalifatullah c'est ene gardien du *Tawheed* (l'unicité d'Allah) dans ene façon particulier. Allah (swt) fine tenir So promesse après Nabi Kareem (saws) kot ti ena bane *Khulafa-e-Rashideen* et puis après le Messie Promis (as) fine ena *Khulafa-e-Massih* ; mais couma Allah (swt) fine promette dans Quran Shareef, dans Surah Noor, Chapitre 24, Verset 56, Allah fine promette bane ki ena la foi et faire bane bonnes actions d'après commandement d'Allah, ki suivre Allah (swt) So l'instruction couma pour gagne la foi et ki obéir Allah (swt) et couma pour pratique le bien et kot sa pour réfléchir lors zot bane actions, alors Allah (swt) pour place lors la terre So gérant, So Khalifatullah couma Li ti faire avec bane ki ti vine avant, kot Allah (swt) renforci la religion ki Li fine parfaire et Li bien content sa religion là et Li pour transforme zot la crainte en sécurité.

Sa en fait c'est ene cadeau ki vine de coté d'Allah pour bane croyants sincères, ki ena la foi en l'unicité d'Allah couma bêton, ki ena le *Taqwa* (la crainte seulement pour Allah) et non pas la crainte de créature/s. Zot adore seulement Allah et zot pas associé narien avec Allah. Zot l'amour pour Allah (swt) péna fin et zot capave donne zot la vie pour la cause d'Allah.

Ene Khalifatullah li ene gardien lors zot tous ; li vine zot le cœur, li vine zot cerveau et n'importe kot ene Khalifatullah trouve ene brin de *Shirk*, li pour élimine sa et ene Khalifatullah pas pour prend conte ki le monde pour dire à propos de li, ou sois ki zot mal pense de li. Li ena confiance ki dans bane situations pareil, Allah (swt) pour toujours aide So Khalifatullah ki li fine choisir et fine élever.

Avec la venue d'ene Khalifatullah, céki fine arrivé dans le passé dans l'époque du Khalifatul Massih, *Insha Allah*, avec l'aide et l'instruction divine, le Khalifatullah pas pour permettre ki tous sa répéter dans ene Jamaat kot Allah So Khalifa là ! Et moi comme le Khalifatullah de sa l'époque là, mo faire sa annonce là fermement, kot ena le Jamaat Ul Sahih Al Islam dans le monde entier pas pour laisse bane innovations et le *Shirk* rentre dans le Jamaat. Si jamais sa existé dans le Jamaat Ul Sahih Al Islam, ki mo pas conner et si jamais mo alle au courant de sa, mo pas pour capave laisse zot *Bai'at* attacher avec le Khalifatullah de sa siècle là kot en même temps pé faire *Shirk*, amène bane innovations etc. etc. dans le Jamaat. Pour moi plutôt sa qualité dimoune là casse so *Bai'at* et li aller kot li envie aller, sa pas faire moi narien. Si ene dimoune vine *Murtad*, Allah (swt) pour faire des centaines dimounes pieux et sincère et ki *Mowahid*.

En fait le Khalifatullah et bane *Muttaqi* ki autour du Khalifatullah, nous ena ene devoir envers nous Créateur pour rempli le monde avec le *Tawheed* (l'unicité d'Allah) et c'est nous devoir sa, pour protège le *Tawheed* dans tous so niveau. Donc à tous bane ki pé adhère zot dans le Jamaat Ul Sahih Al Islam, zot bizin tini ferme lors sa serment (*Bai'at*) ki zot fer avec Allah et avec le Khalifatullah en réalisant tout céki mo pé faire zot comprend. *Insha-Allah*.

Pense bien, kan Allah envoie So Khalifa, ensemble li envoie le Saint Esprit lors li pour retire zot tous de l'obscurité, et pour gagne sa la Lumière Divine là, ou bizin attache ou fermement avec le Khalifatullah et sa travail pour bâtir le *Ummat-e-Wahida* (ene sél communauté de bane dimounes, de bane croyants), c'est le devoir seulement du Khalifatullah et péna personne d'autre ki pour gagne sa privilège là. Allah fine choisir moi par So grâce immense et dans So sagesse infini comme So Khalifatullah dans sa siècle là et c'est Allah même ki fine donne moi sa l'honneur et sa grâce là, ki sa travail pour bâtir le *Ummat-e-Wahida* ki pour servi Hazrat Muhammad (saws), fine donne sa, dans sa l'époque là à So Khalifatullah.

Céki mo capave dire avec beaucoup de regret et de tristesse ki bane ki fine écoute zot idole sans faire *duah* avec Allah (swt), sans cherche l'aide avec Allah si pas mo vrai ou mo fausse, et kot zot fine écoute zot idole, pour rejette sa vérité là et tourne zot les dos avec tous zot l'arrogance, ene jour zot pour regretter. L'heure là li pour trop tard. Zot pou regretter ki zot fine nek écoute bane fausse versions et zot bane idoles, et kot zot fine coupe tous zot relations avec moi, et par conséquent zot fine coupe zot relation avec le *Ummat-e-Wahida* et lèrlà n'importe ki zéffort zot pour faire, même li noble, li pas pou porte aucaine succès.

Depuis 2001 ziska azordi fine arrive 2015, zot fine trouve bane signes claire de coté d'Allah, mais zot fine persister pou rejette la vérité et vine aveugle, mais alors kot zot capave aller encore avec lizié fermer ? Heureux à bane ki reconnaitre Allah So Khalifatullah et pas fine peur boycotté, persécution, épreuve lors épreuve. Arrive céki arrive zot pas fine hésiter pour ene seconde pour accepter, et croire sincèrement dans le Khalifatullah de sa siècle là et tellement zot fine attrape fort sa croyance ki zot ena dans Allah et le Khalifatullah fermement, zot pé travaille nuit et jour pour la cause d'Allah pour donne les autres dimounes à travers le monde entier nouvel de l'arrivée d'ene Khalifatullah de sa siècle là. Zot pé dépense zot lé temps, l'énergie, l'argent, zot pé fer sacrifice lors sacrifice, avec la joie, malgré ki zot la vie, l'honneur, travail en jeu, mais sa pas dire zot narien. Zot conné ki promesse ki Allah (swt) fine faire à bane croyants fine réaliser dans sa l'époque là. Donc sa péna aucaine danger là dans pour mo bane disciples ferme et sincères. Mo bizin dire ki mo bane disciples pé faire revivre bane disciples de nous bien-aimé prophète Hazrat Muhammad (saws) et n'importe ki l'instruction mo donné, n'importe ki l'annonce mo faire, zot faire *Labbaik* (zot réponde présent et zot vine de l'avant sans hésiter), et zot fidélité avec le Khalifatullah c'est fidélité avec Allah, aussi c'est fidélité avec le Saint Prophète (saws) et aussi fidélité avec Massih Maoud (as).

Ene Khalifatullah, li pas donne aucaine l'importance so propre être. C'est pour sa raison là ki bane ki pas croire dans so revendication dire, c'est sa qualité dimoune ki pé dire ki li pé gagne révélation et pé proclame li ki li ene Messenger d'Allah ? Alors zot moque de li, ridiculise li. Donc sa aussi important pour conner ki ene Khalifatullah conne so péché et tous so bane faiblesse pli bien et li au courant très bien ki position Allah (swt) fine élève li pour occuper et définitivement Allah (swt) pour protégé li et so ministère comme l'homme de Dieu, bé lirlà ki arrivé ? Comprend sa verset dans ene *Nazam* (poème) de Hazrat Massih Maoud (as) ki dire: « ***Eh bane imbécile ki pé vine attaque moi avec faucille, maziné ki moi mo ene branche ki porte beaucoup de fruit, jamais le Jardinier pour permettre ki zot attaque moi.*** »

Ene Khalifatullah ki fine élever par la main d'Allah, bé définitivement li sa branche ki pour ena bane fruits ki pour attirer, regard de tous bane dimounes. Donc, c'est bane fruits ki Allah (swt) ré-établir dans le monde et Li fine faire li bien vert et florissant pour donner le fruit de *Tawheed*. Si ou attaque sa avec mauvais l'intention, ou bien ou pense mauvais de sa, alors ou détruire ou-même, parski c'est Allah ki déboute derrière li pour supporter li. Allah (swt) fine établir So Khalifatullah lors la terre jusqu'à ki li atteindre so but ultime, c'est-à-dire, établir ene seul religion lors la terre, répandre le *Tawheed* et faire le monde accepter le Saint Prophète (saws) couma le sceau des prophètes dans quatre coins de la terre. So l'arrivée même fine prophétiser dans tous bane religions et tous bane livres sacrés par bane prophètes précédents.

Ki Allah ouvert le cœur de bane chercheurs de vérité pour accepter sa vérité là avant ki Allah (swt) So grand punition frappe le monde. Donc, nous faire *duah* ki Allah (swt) éloigne de nous So punition divine et ki le monde reconnaitre sa grand vérité là. *Insha-Allah, Ameen, Soumma Ameen.*